

**Kerajaan tidak sekat laporan media
Utusan Online
Ogos 15, 2011**

KUALA LUMPUR 15 Ogos - Datuk Seri Najib Tun Razak berkata, kerajaan tidak akan melakukan tapisan atau sekatan terhadap mana- mana media tetapi jika laporan yang disiarkan berunsur fitnah, media berkenaan bakal berdepan tindakan undang-undang seperti saman.

Perdana Menteri berkata, tindakan menapis dan melakukan sekatan terhadap media meskipun laporan yang disiarkan bertujuan memburukkan kerajaan, bukan lagi tindakan yang efektif dan relevan dengan landskap politik serta kecanggihan teknologi pada hari ini.

Menurut beliau, jika kerajaan bertindak menyekat dan menapis laporan sesebuah media dalam persekitaran rakyat hari ini yang merupakan golongan terpelajar, yang hidup pada era ledakan teknologi maklumat, ia lebih banyak mendatangkan kerugian berbanding keuntungan.

"Sebagai sebuah kerajaan dan juga pengamal media, kita perlu mengubah suai dasar dan cara kita bertindak supaya kerajaan tidak dilihat sebagai tidak memahami landskap baru atau lebih berat dari itu, tidak lagi relevan dengan persekitaran politik dan sosial hari ini.

"Dalam landskap baru ini, kita harus tanya diri sendiri sama ada tapisan itu berkesan, relevan serta efektif atau tidak? Sebab itu saya telah memutuskan bahawa cara lama yang kita amalkan perlu dikaji semula," katanya semasa berucap pada majlis berbuka puasa bersama media di Wisma Bernama di sini hari ini.

Tambah Najib, dasar untuk tidak menyekat dan menapis berita itu juga merangkumi media-media antarabangsa walaupun mereka sentiasa melaporkan berita yang negatif mengenai kerajaan Barisan Nasional (BN) dan Malaysia.

Katanya, setiap laporan tidak tepat dan bersifat negatif yang dilaporkan media antarabangsa perlu ditangani dengan cara mendedahkan cerita sebenar dengan disokong oleh fakta, bukannya dengan cara menyekat mahu pun menapis berita tersebut.

Jelas beliau, contoh terbaik bagaimana kesan buruk menimpa kerajaan apabila tapisan dibuat ialah apabila artikel dalam majalah The Economist ditapis baru-baru ini dan akibatnya, kisah mengenai sekatan itu yang lebih menjadi isu hangat berbanding nilai sesebuah berita.

Pada majlis itu, Najib turut menunaikan solat Maghrib, Isyak dan sunat Tarawih serta menikmati moreh selain menyampaikan sumbangan kepada golongan warga emas dan orang kurang upaya (OKU).

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2011&dt=0816&pub=Utusan_Malaysia&sec=Muka_Hadapan&pg=mh_02.htm